

Fau v/Eikanger skule

Lindås kommune



Innspel til arbeid med ny tomt **-Eikanger og Kløvheim skulekrinsar** **Ny felles skule**

Eikangerbygda i jamn og god utvikling, ein av få skular i vekst

Det har dei seinare år vore stigande elevtal på Eikanger; i 2009 hadde me 52 elever, i dag er talet 78. Bygda er i vekst, og me registrerer at bygda er populær også for familiar som ikkje har tilknytning til bygda frå før. Området kring E39 i Osterfjorden er i god utvikling, og Eikanger vil vere ein sentral stad for framtidig utbygging. Eikanger ligg naturskjønt til like ved E39 og Osterfjorden. Saman med nærleiken til Knarvik og Bergen er dette sannsynlegvis det som i størst grad ligg til grunn for at Eikanger har vorte ein attraktiv stad å busetje seg.

Eikanger skule har dei siste åra vore ein av dei få skulane i kommunen med høg og jamn vekst. Næringsarealet er under utbygging og vil gjere Eikanger til ein endå meir attraktiv plass å busetja seg.

Når vi har vurdert aktuelle tomtar for ny skule, har vi tatt omsyn til at nærskuleprinsippet vil måtte styre plasseringa. Dette har vi gjort nærare greie for etter våre forslag til lokasjon.

A Eksisterande skuletomt

Dagens skuletomt, inkludert tilleggsareal som ligg i arealdelen av kommuneplanen, vil vera stort nok areal for ein felles barneskule. Ny E39 gjennom Eikanger er planlagt nord for området, og evt. som tunnel, så høgst truleg vil denne ikkje koma i konflikt med dette forslaget. Tomten er i nærleik til natur, turløyper og skulen nyttar ofte aktivitetsparken i skogen som uteskule.

B Tomt like nord for eksisterande skuletomt

Sentral plassering nær fylkesvegen. Plassert 300-400 m nord for eksisterande skuletomt. Ligg ope og fint til i eit område som dei siste åra er nytta som deponi for jord og stein. Området er i dag delvis dyrka. Ny E39 gjennom Eikanger er planlagt like ved området, anten som tunnel eller i ope landskap.

C Område ved fylkesvegen, ved starten av Mykingvegen

Området ligg svært sentralt plassert og gjev kort skuleveg, på same måte som alternativ A og B. Rikeleg areal er tilgjengeleg. Nærleik til natur, turløyper og aktivitetsparken.

D Utkanten av industriområdet

Det er etter det vi veit, rekkefølgekrav til gang og sykkelveg bort til næringsområdet. Infrastruktur, vatn og kloakk er på plass, og delar av arealet rundt er tilrettelagt. Arealet ligg like ved eksisterande aktivitetspark som skulen alt nyttar ved uteskule. Dette er allereie regulert areal som ved god planlegging og utnytting, kan vere ei god løysing.

E Område på sørsida av E39, på motsett side for næringsparken


I dette området er det rikeleg med areal, og grunneigar er positiv til omregulering av området. Eventuell gang og sykkelveg til næringområdet vil også kunna nyttast til eventuell ny skule. Det eksisterer allereie to undergangar (for mjuke trafikantar) i området, under E 39. Såleis vil ein relativt enkelt kunne leggje til rette for ein trygg skuleveg for nær alle elevane som går på Eikanger skule i dag. Ligg like ved eksisterande aktivitetspark som skulen alt nyttar til uteskule.

F Tomt i regulert bustadfelt på Fyllingsnes

Her er det allereie regulert inn ein tomt for barnehage, og dette kan gjerne vere alternativ plassering. Heile området ligg i dag for sal, og må uansett regulerast på nytt der ein kan leggja til rette for meir areal til skule. Dette er eit stort område (ca 120 mål).

G Område bak Vaage Karosseri

Stort område som er svært aktuell dersom ein skal tenkje framtidsretta og ha opning for ei vidare skuleutbygging i framtida, spesielt med tanke på ein eventuell ny ungdomsskule. Alternativet er det som gjev lengst køyreveg for elevar frå Kløvheim.



Nærskuleprinsippet

I opplæringslova §8-1 står det at barn i grunnskulen har rett til å gå «(.....) på den skulen som ligg nærast eller ved den skulen i nærmiljøet som dei soknar til.»

Ein kjem ikkje utanom at nærskuleprinsippet får store føringar for kva alternativ som vil kunne la seg gjennomføre når ein no skal finne tomt for ny felles skule for Eikanger og Kløvheim. Retten til å gå på den skulen som er nærast er ein absolutt rett, og ein vil måtte ta omsyn til dette når ein skal fastsetje lokalitet for den nye skulen. Området nord for Eikangerbygda vil etter det vi kan sjå, derfor ikkje vere å foretrekkje for ny skuletomt.

Ei skuletomt på Kløvheim

- Medfører at alle elevar som er busett sør for eksisterande Eikanger skule, vil ha Leiknes som nærskule, nokre få Ostereidet barneskule. Dette utgjer ca 80-90% av dei elevane som går på Eikanger skule i dag.

Ei skuletomt på Høyland

- Medføre at delar av elevane som er busett på Fyllingsnes får Leiknes skule som nærskule.
- Svært få elevar bur i Høylandsområdet i dag. Størstedelen (90%) av elevane som i dag høyrer til Eikanger skule, vil få 3-5 km skuleveg langs fylkesvegen.
- Det vil verta ein vanskeleg og farleg skuleveg kor det trafikalt er svært krevjande med mykje tungtrafikk på smal veg. Vi vil få svært mange elevar som blir køyrd til skulen, og i eit folkehelseperspektiv er dette noko vi må unngå.

Ei skuletomt for framtida

- Der hovudtyngda av elevane bur - Me har dei siste åra sett ei stor bustadutbygging i nabokrinsen på Leknes. Området vidare innover E39 på Eikanger har også hatt auke, og området har stort potensiale om det vert lagt til rette for ytterlegare vekst. Dette vil før eller seinare tvinga fram behovet for ein større og meir moderne skule. FAU på Eikanger meiner ny felles skule bør lokaliserast der hovudtyngde av elevane bur, og der ein på lang sikt kan rekne med størst befolkningsvekst. Eikanger skule har i dag ca dobbelt så mange elevar som Kløvheim skule.
- Naturleg gjennomfartsstad - Vegen til kommunesenter, kjøpesenter og mange arbeidsplasser går via E39 ved Eikanger og vidare mot Knarvik og Bergen. Dette gjev eit naturleg køyremønster både for folk på Eikanger og Kløvheim som skal vidare mot Knarvik/Bergen. Retninga nordover mot Kløvheim vert «feil veg», og veldig upraktisk for størstedelen av foreldre og elevar frå Eikanger. Ny felles skule bør difor lokaliserast i området kring noverande skuletomt på Eikanger.
- Folkehelseperspektiv - Ei skuletomt på Eikanger vil gje fleire elevar som går/sykler til skulen. I tillegg vil mange elevar kunna nytta fritidstilbod knytt til skulen utan å verta skyssa i bil. Vi veit at ein skule i nærleiken er eit areal som fordrar aktivitet og samspel også etter skuletid og feriar.

Vidare prosess

Vi stiller oss gjerne til disposisjon dersom Rambøll ønskjer eit møte/telefonmøte/synfaring for å få innspel til konsekvensar ved dei ulike tomtealternativa.

Eikanger 30.09.2016

Med venleg helsing

Foreldreutvalet ved Eikanger skule